



Hamas-i Israel nunger tepuokertem chiok

National football team director asütsü Subrata shim



VOL. XXII ISSUE NO. 130 (ADOK 130)

DIMAPUR

AMUNGNÜ (SUNDAY)

TSÜKLAI (FEBRUARY) 23, 2025

₹ 5.00

Supongmeren-i FMR aser PAP atema Centre aitsür

Kohima, February 22, 2025

(TYO): Centre sorkari parnoki yangluba Act East Policy den meputepi Indo-Myanmar arrtsülen FMR agienba aser PAP tanaben benokba aitsür ta Lok Sabha MP aser Nagaland Congress president, S Supongmeren Jamir-i ashi.

"Centre-i Indo-Myanmar arrtsü nung Free Movement Regime (FMR) kilometre 16 aliba nungi 10 dang akümba atema tebilemtsü abener. Centre-isa Protected Area Permit (PAP) tanaben benokba ya tebilemtsü khuret lir aser Congress-i Centre dang item lemtet meypa agitsü maneni rongshitsü" ta pai ashi.

FMR azüokba ajanga Nagaland nung alirtemi tetsükdaktsü aika ajurutsü. Indo-Myanmar arrtsü nung senzusenbong azüokba ajanga Myanmar nung aliba Naga nunger den tesentaktep raksatsür ta Supongmeren-isa ashi.

Centre-i item lemtet agiba ya Act East Policy den meputep lir. FMR azüokba ajanga cross-border trade aser exchange nung ajemdaker alirtemi timtem kanga ajurur kechiyong iba inyakyim ta

mapang talangka nungi inyaka arur, ta pai ashi.

Burma tsütsü Naga nunger yimtsüng aika lir. India sorkari northeast aser talisa Naga nunger indang tebilemtsütem meteta lir. Naga nunger adianutem tsüngda international border atsü malitsüla, ta Supongmeren-isa shisem.

Centre-i Pangsha aser Longwa nung International Trade Centres amenokogo saka international border atsü atsüadangba ajanga international trade nung timtem ajurutsü aser Trade Centres lapokba amajok asütsü, ta pai metetdaktsü.

Congress-i Parliament nung maneni Naga nunger atema ola adoktsü. Item lemtet ajanga Naga nunger timtemba Centre-i meteta lir anungji parnoki meypa repringshitsü, ta paisa ashi.

PAP tanaben benokba ya Nagaland atema khuret dang masü saka Centre aser international tourists atemaa tebilemtsü lir. Onoki iba ya meypa agitsü noktaker aser Nagaland nem timtem magütsütsü ashir, ta Supongmeren-isa metetdaktsü.

Union MoS Vardhan Singh-i Nagaland semdang

Dimapur, February 22, 2025

(TYO): Union Minister of State for Environment, Forests and Climate Change and External Affairs, Government of India, Kirta Vardhan Singh-i February 19 nungi 22, 2025 tashi Nagaland semdangogo.

Iba mapang MoS Singh-i Khezakeno village nungaliba Chida Lake semdang aser pai yimtsüng tanishirtem dang biodiversity wazüka ayutsü ayongzük.

Paisa Phek district kübok Zhavame village nung aliba Kapamodzu Peak semdanga liasü. Idakji pai Village Council züngsemtem aser Joint Forest Management Committee (JFMC) züngsemtem den ajurupet.

Iba mapang District Administration, Police, aser Forest Department Phek Division nungi ketdangsur aser staff temi MoS Kirta Vardhan Singh meina senzü.

VBDAN indang office ka lapokogo

Kohima, February 22, 2025

(TYO): Honibarnü Red Cross Building Kohima nung Voluntary Blood Donors Association of Nagaland (VBDAN) office lapokogo. Iba office ya VBDAN patron Atosheli Zhimomi-i lapoktsü.

"VBDAN-i 2011 nungi tenzüker inyaka arudang Nagaland nung ajaki metettsüsa inyaktetogo aser ano office ka lapokba atema tenüngsang agütsür" ta Atosheli-i ashi.

VBDAN-i voluntary blood donation ajungkettsü asoshi bendanga agüja inyakba ya Nagaland ajungalen meteta lir. VBDAN züngsem aikati blood donation ya mission ka ama inyaker aser nisung takütem kümzüker, ta lai ashi.

"Kütem süia arudang VBDAN-i school o college balala nung awareness programs aser blood donation drives agia arur" ta VBDAN president Purakum-i osangbener den jembidang ashi.

"Azü tenla agütsürtem rongnung college kaketshirtem aser Assam Rifles lir aser parnoki Association den kanga yaritepa arur. Maneni, medical college aser NHAK blood bank center ajanga VBDAN den yariteper" ta pai ashi.

"Arishi küm 18 ser temapurtemi Nagaland Blood Donors app (android) ajanga Association nung züngsem akümtsü akok" ta Kohima District Blood Donors Association president Bendang Imsong-ia ashi.

"Iba app ya 2022 nung adok aser onoki teyariteper ka ama shilem agir. Onoki azü nüngdakertem aser tenlatsüpur tsüngda sendakteptsür, iba tangatetba nung Nagaland Blood Donors app (android) yanglu" ta pai ashi.

"Küm nung onoki tongtipang anogo ana amonger, kaji June 14 nü World Blood Donors Day aser October 1 nü National Blood Donation Day lir" ta VBDAN founding president Alipoker-ia ashi.

Asenoki nisung ajak akhümtsübuttsüla: Dr. S.C. Jamir



Dr. S.C. Jamir-i Linguistic Minority Forum of Nagaland-i ayongzükba Youth Conclave cum Cultural Fest nung jembidang agiba noksa ka angur.

Dimapur, February 22, 2025

(TYO): "Asenoki nisung ajak agizükettsüsa tangatetba alitsüla aser Nagaland nung nübo agi tangar memenepertem temeten aser maparen akhümtsübuttsüla" ta taoba Governor aser Chief Minister Dr. S.C. Jamir-i ashi.

"Nagaland nung yimten lennirtemi oshi agi tangar memenepba nisungtem yaritsüla aser parnok nem maongka agütsütsü. Yamaji asü nung dang lanu pututemi Nagaland tashitaitba yangerba nung shilem agitsü" ta pai ashi.

Dr. S.C. Jamir-i iba tayongzükba olen ya Linguistic Minority Forum of Nagaland-i

ayongzükba Youth Conclave cum Cultural Fest nung jembidang ashi.

"India ya secular linük ka lir aser tamangba yimsü ajak kasa temeten lir saka tanü Indian politics jenjang yamai akümba atema aoksar. Tanübo tali bilemloka oa amangertemi tanga tamangba yimsü amangertem amaker" ta paisa ashi.

Tali bilemloka aoertemi linük nung minorities samatsütsü meranger. Iba inyakyim ya Nagaland ama state tila aser ano tanga northeast state tem atema majung ta Dr. S.C Jamir-isa ashi.

Linük tashi itdaktsünüra secular asütsüla. Asenoki

secularism tangatetba nung melira taruba küm 10 mesüra 20 sülen India ya khenyongi balaka akümtsü ta paisa metetdaktsü.

India ya 'unity in diversity' lir aser kin temeyoktep aliba linük nung telongjem indang mangdang ayur saka tanü nisungtem tangatetba melenshiba atema sasar ta Dr. Jamir-isa ashi.

"Nagaland nung district ka dang liasü saka tanübo 17 kümogo. Naga yimten tebilemtsü atema party ka dang liasü saka tangbo 26 kümogo. Asenoki iba linük nung tamajung tangatetba ang talila kümdaktsür masü na? Lanur yimsüsürtemi linük meimtsü tangatetba alitsüla aser iba ajanga dang linük longjemdaktsütsü" ta paisa ashi.

"Indo-Naga yimten khuret angatettepba sülen Nagaland jenjang temabai atutsü. Nagaland-i tashi angutsü aser yimjung aruba sülen Nagaland tenüng wangshitsü" ta Dr. S.C Jamir-isa ashi.

Iba sentong nung Advisor to Nagaland Chief Minister Dr. Chumben Murry; Rajya Sabha MP Sushmita Dev aser Assam Linguistic Minority Development Board (ALMDB) Chairman & taoba MLA Shiladitya Dev nungeria o jembi.

Nagaland sorkari socio-economic tebilemtsütem nung temulung agütsütsüla: AICC Secretary Christopher Tilak

Kohima, February 22, 2025

(TYO): "Nagaland state sorkari Naga yimten tebilemtsü nung temulung agütsüadang lanur aser tetsürtem tebilemtsü senzüka yutsür" ta Nagaland atema AICC Secretary in-charge Christopher Tilak-i ashi.

Nagaland Pradesh Congress Committee (NPCC) district tour mezüngbuba shilem tembangba sülen osangbener den jembidang Tilak-i "sorkari Nagaland nung socio-economic tebilemtsütem asoshi temulung magütsür saka yimtenren tsütsü dang ashir" ta ashi.

Tilak den külemi NPCC president & Lok Sabha S. Supongmeren Jamir aser Working President Khriedi Theunuo nungeri February 18, 2025 nü Peren district nungi tour tenzüka liasü. Parnoki Dimapur, Wokha, Mokochung aser Phek district tem semdangba sülen tanü Kohima tonga aru.

District balala sema senzüadang mapa manguba, pei talidak melenshiba, basic infrastructure maliba aser gari lenmang majungba indang tebilemtsü onüktem lemsatepa

liasü ta Tilak-i ashi.

"Nagaland nung yimtsüng aika nung education, healthcare, aser transportation amala essential services mali. Gari lenmang ya kanga dang tongtipang tebilemtsü ka lir kechiyong lenmang majungba ajanga terenlok angutsüba nung tetsükdaktsü ajurur" ta Tilak-i ashi.

"Congress-i Nagaland nung yimten tebilemtsü dang masü saka socio-economic tongtipangtem atema temulung agütsür. State sorkari Nagaland nung alirtem ajungkettsü atema infrastructure, roads, schools, aser healthcare amala development indicators nung temulung agütsütsüla" ta paisa shisem.

"BJP-i aniba Centre sorkari terenlok indang tiyazü tangatetba agütsür. Parnoki double-engine sorkar indang jembir saka asangsang nungbo mapa meinyaker. BJP sorkari terenlok indangbo jembir saka chichiba terenlok mali aser iba ya talisa Nagaland nung yimtsüngtem ajanga sayur" ta Tilak-isa ashi.

Nagaland nung Congress jenjang junga kümdar aser iba ya

talisa 2024 parliamentary election sülen ajangshir. Iba takok ya Nagaland nung alirtemi temelenshi aginüba ajanga lir, ta paisa ashi.

"Congress-i taruba itatem party akangshitsü aser lanur o tetsürtem i shilem agitsü asoshi temulung agütsütsü. 2028 state elections atema mapa tenzükogo aser MLA teimba küma sorkar nung shilem agitsü nükjidong lir" ta AICC Secretary Tilak-isa ashi.

Nagaland nung Khristan teimba ser aliba agi Congress-i telongjem aser secularism nung temulung agütsür ta NPCC Working President Khriedi Theunuo-i ashi.

Onoki Nagaland nung küm aika opposition ama aruba sülen Congress party yanglushitsü ta Theunuo-isa ashi.

"Congress-i 2028 election atema asalentong yanglubaji ajemalutsü aser nübortem dak ranglokba party ka asütsüba lir. Onoki tanga party tem ama tashi atema dang mapa meinyaktsü kechiyong iba ajanga timtem ajurur" ta NPCC president Supongmeren Jamir-i ashi.

25 Mongoya ACCC Lijaba Lijen Unit pur Congress Bhavan mesemtet



25 Mongoya ACCC tir, Alemkaba Jamir-i Lijaba Lijen Unit pur Bhavan mesemba tamaitüsü Congress wako atsüketa yutsür telen aser kongsang balala nungi Congress ketdangsürtem telok noksa tangokba ka angur. (Mokokchung, 22nd February, 2025)

Mokokchung, 22 Feb: 25 Mongoya Assembly Constituency Congress Committee (ACCC) Lijaba Lijen Unit pur Congress Bhavan asütsü asoshi Lijaba Lijen Ward, Mokokchung nung alir Wb. Lanutemjen'er ki mesemtetogo. Bhavan lapokba tamaitüsü 25 Mongoya ACCC tir, Alemkaba Jamir-i Congress wako meraketa atsüketa yutsüogo.

Alemkaba-i iba sentong nung jembidang, pei sasa ulua bilemba aser asüküm jakla ajanga tanü lokti aika rajang kümdaktsür aser iba yimya aketba jagi asenok tsüngta tepila aser rarabangsen dang tali dendaktsür, iba shisatsü ali tashi asenok tejakleni maotsü. Anungji, iba yimyaj i intoker kadi ka aküm tsübuteptsüla aser ajemalurtemji Tsüngremia moatsür, ta ashi.

Political party nung tera (grass root)-ji unit-tem ya lir, unit-tem tashi itta alinung dang A/C ji tashi aittsü, aser A/C tashi ait nung dang district level tashi

aittsü aser yamaji tematiba jenjang tashi itta atutsü. Anungji, unit nung meranga inyaktüsü asoshi pai ajungshia liasü.

2028 election nungji asenok lungjemer 25 Mongoya Assembly Constituency nungi Congress candidate tetemsü ka shima takok anguba den Nagaland nung ruling government bener arutsü asoshi nükla yur tang nungi meranga inyaktüsü asoshi paisa tayongzüka agütsü.

BJP ya Naga nunger asoshiho mapet, asenok asoshiho tapet political party ji Congress dang lir, kechiaser Congress-i dang tamangba yimsü ajak akümtsübur aser democratic yimsüsüba dak ajemdaker maparen ajak inyaksangshir, anungji, Naga nungeri ya angatetsüla, ta 25 Mongoya ACCC tirisa metetdaktsü.

Unit nung alirtemi mapa meranga inyakba ajanga Mokokchung District kübok A/C balala rongnung 25 Mongoya

ACCC jenjang tajungtiba nung lir, aji oda, tanü Lijaba Lijen nung Congress Bhavan mesemtetba ajanga ano Congress party tali tashi itta akümtsü imlar, ta paisa shisem.

Iba sentong nung DCC Jt. Secretary, Alemchiba-i mapang tatsüka agidang, tanü Nagaland Legislative Assembly nung Congress MLA kata mali, saka MP kabo lir. Aji oda, asenok telungjem nung putepa lira tarutsü nung asenoki takok angutsü imlar, ta metetdaktsü.

Sentong nung 25 Mongoya ACCC Lijaba Lijen Unit General Secretary, J. Manen menden liasü. Lijaba Lijen Unit President, Imtitemsü-i tarur pela-a agizükba o jemb i. MTBA deacon Impang den temoatsü meshia sarasadem sentong tenzük aser executive member, N. Waten-i tepela o lemsatet. Iba sentong nung DCC, ACCC, tanga unit nungia densema Lijaba Lijen Unit kongsang balala nungi ketdangsürtem aden.

Manipur nung PR anema longkak ait

Imphal, Tsüklai/February 22 (Agencies): Hokolbar aonung Manipur kübok lenden nung aliba tesem balala nung nüburtemi yimtsüng volunteer tem apuba aser President Rule benokba anema longkak aita liasü.

Imphal East, Imphal West, aser Bishnupur district nung milenpong tsükloka bener longka aitba sentong ayongzüka agi. Longkak

aitertemi taoba mapang ama tensa tajungba kümdaktsütsü aser state sorkar tasen ka takaratiba nung tentettsü khanga liasü.

Imphal West nung Lamlongei Youth Progressive Club aser local Meira Paibis (tetsür lokti tentettem) tem longjemer Mantripukhrak shishilembadak longkak aita liasü. Kasaji Imphal East nunga Phukhao, Khundrakpam, aser

Ahanlup nung nüburtemi milenpong tsükloker longkak aita liasü.

Longkak airtertemi President's Rule agintsü aser sorkar tasen tentettsü khanga placard tem amer longkak ait. Khundrakpam nung Meira Paibi lenir kati, Centre sorkari telok ka dang pusema yimtsüng volunteers tem apuba aser hadir balala rakzüka ayuba atema aitsüogo.

Youth Congress-i Guwahati nung longkak ait

Guwahati, Tsüklai/February 22 (Agencies): Honibarnü Guwahati kübok Six Mile tesem nung Assam Youth Congress-i ayongzüka longkak aitba sentong tulu ka agiogo.

Youth Congress lenir Zubair Anam sota ayuba aser Congress MP Rakibul Hussain amakba anema Youth Congress-i longkak aita liasü.

Zubair Anam-i pa kidang sota ayuba sülen ashiba agi, pa o sadem sadem jembitsü nungi nokdangar.

Paisa, MP Rakibul Hussain amakba aitsüogo aser ashiba agi, iba ya democracy mezüngmeshiba lir.

Pai ashiba agi, Youth

Congress team-i Assam DGP nem MP amakba dak sendkaba nung takhangba ka agütsütsü merangandangogo.

Anam-i ashiba agi, MP Hussain dang amakba masü saka pa security atema agütsüba police dena maka liasü.

"Temetetsü kaji aibelena alir jangjar liaka police temi tang tashi nung nisung ka danga pua mali. DGP-i aija alir anema jenjang kecha magitetra pai pa mapa toktsütsü nüngdaker," ta Anam-i ashi.

"Assam Police Service ya joko APS masü kümogo saka iba ya HBS-Himanta Biswa Service kümogo," ta pai shisem.

Nagaland Police Training School nung seminar ka agi



Dimapur, Tsüklai/February 22 (TYO): Importance of Oral Health & Ill effects of Tobacco dak sendakba nung seminar ka den repsema Dental Health Camp ka National Oral Health Programme Dimapur-i ayongzüka Nagaland Police Training School Chumoukedima nung agiogo.

National Oral Health Programme (NOHP) aser National Tobacco Control Programme (NTCP) Dimapur nati ayongzüka Oral and Dental Health Camp ya February 22 nü Nagaland Police Training School Chumoukedima nung sepa i aser ketdangsürtem asoshi katsüogo.

Lokti pela agizükba o jembiba mapang Nagaland Police Training School Principal-i, iba amala kanga dang tongtimbang seminar ayongzüka katsüba atema Programme Officer aser team

dang kanga pelaba lemsatet, aser personnels aser parnok kinungertem dang iba maongka ya takok tashi agitsü ayongzüka liasü.

Sentong nung DR. N. Moa Jamir, District Nodal Officer NOHP & NTCP-i "The importance of oral health and ill effects of Tobacco consumption" onük nung ajemdaker Power Point Presentation ka agütsü, aser iba sülen sensaksem mapang ka agia liasü.

Camp mapang oral cancer screening, consultation aser tepu majungertem loktoktsüba amala agia liasü. Maneni temang anepalurtem nem angati mozü agüja liasü.

District Hospital Dimapur nungi Dr. Japheth Yephthomi, Dr. Imtiyala, Dr. Kanovi Yephthomi aser Social Worker NTCP Medongunuo nungeri iba camp nung shilem agia liasü.



INDIAN OIL CORPORATION LIMITED

(Marketing Division)



Advertisement No IOCL/MKTG/HO/REC/2025

All India Open Recruitment of Experienced Personnel in Non-Executive Category & Special Recruitment Drive [SRD] for Persons with Benchmark Disabilities in Non-Executive Category

Extension of Date for Submission of Application

Attention laga dor kaam kuri kena advertisement 3rd February, 2025 te newspaper te issue kuri se, juntu modot online application eligible candidate khan karone invite kuri se nicha thaka post karone:-

A) All India Open Recruitment of Experienced Personnel in Non-Executive Category karone:

Post Code	Grade	Name of Post	Total no. Positions
101 to 123	Gd-I	Junior Operator	215

B) Special Recruitment Drive [SRD] Only for Persons with Benchmark Disabilities [PwBD] Non-Executive Category karone:

SRD - Posts Reserved only for PwBD			
Post Code	Grade	Name of Post	Total no. Positions
201 to 204	Gd-I	Junior Attendant	23
205 to 208	Gd-III	Junior Business Assistant	08

Upur te mention kuri thaka post karone online application submit kura last date extend kuri kena 28th February 2025, 23.55 hours tak rakhi dise.

Detail advertisement refer kuri bole aru online apply kuri bole, visit kuribi, tai pichi te 'Indian Oil For You' > te jabi, etu piche te 'Indian Oil For Careers' > click kuribi, 'Latest Job Opening' > te ja bole, 'Job Opening' > te click kuru bile, aru 'Recruitment of Non-Executive Personnel in Marketing Division-2025' te jabi.





Government High School Khar nung Tsüklai (Feb) 21, 2025 anogo international Mother Tongue Day mungogo. Language Teacher (MIL Ao) Limanungsang Imchen-i alima nung International mother Tongue anogomung tenzükba otsü sentepba alirtem dang ashi aser, tetsü oshi koda tongtimbang iba indang lemsatetba liasü. Iba setong nung kaketshir ajak agi 58, Tsüraburtem 23 aser tesayur 15 dena shilem tajung agi.

J&K nung yi nokdangtsü atema PDP-i signature campaign tenzük



February 22, 2025 nü Srinagar nung Peoples Democratic Party (PDP) nung inyakertemi Jammu & Kashmir nung yi nokdangang, ta takhangba agütsüdang tangokba noksa nung angur.

Srinagar, Tsüklai/February 22 (Agencies): Jammu & Kashmir tesem ajaklen yi meshi-meshia nokdangtsü atema Honibarnü Srinagar nung People's Democratic Party (PDP)-i nüburtem dang teyari meshia signature campaign ka tenzükogo. Party MLA, Mir Mohammad Fayaz-i Assembly nung benokba bill ka pusema iba campaign tenzük. J&K Union territory tesem ajaklen yi nokdangtsü atema party lenir Iltija Mufti-i Srinagar nung aliba PDP office nung iba campaign tenzüksüogo.

Mufti-i iba campaign ji Sher-e-Kashmir Park nung tenzüksütsü tebilemba liasü saka police-i iba tesemji

memelaba agi party office nung ang tenzük.

Iba campaign tenzüksüba sülen osangbenertem den jembidang Mufti-i, "Tebilemtsü onük tuluka atema onok yangi lir. Yi aser temesepba mozü ya merok-mi ama prokshidar. Kupwara nungi PDP MLA-i yi nokdangtsü atema J-K assembly nung bill ka benokogo. Onoki PDP office nung signature campaign ka tenzükogo," ta metetdaksü.

Laisa, yi aser temesepba mozü ajanga loktiliba raksatsür, ta ashi.

"Onok nükjidongji temesepba mozü anema awareness agütsütsü atema lir. Tesüiba küm ishika tsüngda J-

K nung yi dokan aika lapokogo aser yi talubosa angur. Onoki nüburtem dang iba campaign pusemtsü ayongzüker," ta lai metetdaksü.

Tanga party tem danga iba bill pusemang, ta mepishia Mufti-i, iba ya yimtenren onük ka masü saka loktiliba tebilemtsü onük ka lir, ta ashi.

"Tanga party temia onok pusemtsü ta ni imlar. National Congress, Peoples' Conference aser BJP-ia iba bill ya pusemtsüla, kechiyong iba bill ya yimtenren onük ka masü saka loktiliba tebilemtsü onük ka lir. Jammu & Kashmir nung mapa manguba tebilemtsü tulu lir aser ibaji ajanga lanurtemi yi aser temesepba mozü achir," ta lai metetdaksü.

Party office kima police aika adenshiba dak sendakba nung lai, "Mangatetep adokdaksütsü atema onok yangi adenshiba masü. Onoki tensa merakatsütsü," ta ashi.

Mufti-isa Union Territory sorkar aser Centre sorkar naprongla dang J-K ya yi meshi-meshia manguba region ka kümdakjang, ta mepishi.

"Bihar, Gujarat aser Nagaland state temi yi manguba state kümdaksüba ama inyaksü ni mepishir. Iba (yi) ya tourism den kecha sendaktepa mali," ta laisa shisem.

Modi-i tanü nungi tenzuka state asem semdangtsü

Bhopal, February 22 (Agencies): February 23 nungi tenzuka anogo asem tsüngda Ato kilonser Narendra Modi-i state asem- Madhya Pradesh, Bihar aser Assam semdangtsü; February 23-24 anogotem nung pai Madhya Pradesh yimtiba, Bhopal semdangtsü.

Modi-i mezüng February 23 nü Madhya Pradesh nung Chhatarpur District kübok Gharha yim semdangtsü aser yangji Bageshwar Dham Medical & Science Research Institute amenoksütsü atema lung azüngtsütsü.

Cancer hospital asüba nungji sen crore 200 dak tali indoktsü. Iba hospital nung sensakertembo treatment angati asütsü.

February 24 anepdang 10:00 ako meta Ato kilonser Modi-i Bhopal nung Global Investors Summit semzüksütsü. Iba summit nung Pharma & Medical Devices, Transport & Logistics, Industry, Skill Development, Tourism aser MSMEs indang jembitsü.

Iba sülen nikongdang pai Bihar kübok Bhagalpur semdanga yangji PM KISAN

scheme kübok aluyimertem nem 19buba instalment agütsütsü.

Linük nung aluyimer crore 9.7-i pei meyong bank account nung senotsü teyari angutsü.

Bihar nungsa Ato kilonseri Motihari nung Centre of Excellence for Indigenous Breeds semzüksütsü. Iba ya Rashtriya Gokul Mission kübok amenokba Centre lir.

Ato kilonserisa Barauni nung Milk Product Plant semzüksütsü. Mamatzü producers lakh 3 atema market adokdaksütsü nükjidong nung iba Plant amenoker. Ato kilonser Modi-isa Warisalganj - Nawada - Tilaiya rail section semzüksütsü; iba ya sen crore 526 dak tali indoka yanglu.

February 25 anepdang 10:45 ako nung Ato kilonseri Guwahati semdangtsü aser yangji Jhumoir Binandini (Mega Jhumoir) 2025 program nung adentsü. Iba sülen pai Guwahati nung Advantage Assam 2.0 Investment & Infrastructure Summit 2025 tenzüksütsü.

Iba summit nung ministerial senden tenet aser thematic senden 14 alitsü. Item senden nung Assam indang rongsenkettzüng tashi aser industry terenlok sayatsü.

KONANG TETUSHI AGÜTSÜR



Mongsenyimti Ozüküm, Nokojungba Aso, Nobulemba semchir **Wb. Imkongsüngba Ozüküm-i** sorkar wadang nung temulung aguja aser tashi angaa tenzükba maongka, Nagaland Government-i District Pharmacist Officer jenjangi ajungketba asoshi nümadanga bilemer aser nai iba menden tongtetba asoshi oboula semchirtemi ne nem konang tetushi tulu agütsür aser Tsüngrem tenüng asanger.

Iba temaba jenjang aser takok ya kenüyongi ajangzüktetba mapa ka masü, saka kümsülusü tanitebelem jenti arema züsenbayong aazükaruba senmang ta pelaa agizüker. Ano maneni nübur tenzüksü asoshi Tsüngremi ne nem arishi talang den anema aliba temoatsü agujang ta asen sosem ajungai sarasademtsür.

Kinunger Tenung Nung:-

(1) Imtimaong Ozüküm (2) Matsunglong Ozüküm

Tetsü oshi dang masü oshi ajak akhümtsübuttsüla: Mamata

New Delhi, February 22 (Agencies): Trinamool Congress tongti lenir aser West Bengal Chief Minister, Mamata Banerjee-i, tetsü oshi dang masü saka oshi ajak akhümtsübuttsüla, ta ashi.

International Mother Language Day anogomong sentong nung jembidang Banerjee-i, Bengali oshi ya alima nung nisung teimtibi jembiba oshitem rongnung jenjang pongububa nung lir, anungji Bengali nunger ajaki iba atemaji nüma atangtsüla, ta ashi.

"Tetsü oshi Bengali purtemi Bengali oshiji kanga meimtsüla, ajisüaka tanga oshitem-a kasa akhümtsübuttsüla. Iba anogomong nung ni oshi ajak nem akhüm agütsür," ta lai ashi.

Chief Minister-isa nüburtem tsüngda tesünep, yimjung aser telungjem alitsü atema lai züluba sangro ka zünga metetdaksü.

Kasa sentong nung shilem

agia jembirtemi tang Bangladesh tensa atema jembia liasü, ajisüaka Mamata Banerjee-i, "Iba sentong nungbo tanga linük atema mejembili," ta ashi.

International Mother Language Day ya taoba mapang East Pakistan (tangbo Bangladesh) nung Bengali oshi recognise asütsü atema inyakba nüngtem nung amonger.

Centre sorkari Bengali ya classical oshi ta agizükba dak sendakba nung Banerjee-i, "Bratya Basu (state education minister) densema medemer aikati kanga meranga inyakba ajanga Bengali oshi ya küm meyrjang ka dak tali ta kuli sayuogo," ta ashi.

Laisa, Bengali oshi dak alia state sorkari Rajbanshi, Urdu, Gorkha aser Ol Chiki oshitem-a ajungkettsütsü atema inyaker; tang item oshitem ya school nunga sayur, ta ashi.

Delhi nung sorkar tasenbai Ayushman Bharat Yojana agizükogo

New Delhi, February 22 (Agencies): Delhi cabinet-i Delhi nung Ayushman Bharat Yojana scheme mapa küma benoktsü atema agizükogo; Delhi nung Chief Minister Rekhta Gupta lenisüba nung cabinet-i Ayushman Bharat Yojana agizük.

Ayushman Bharat scheme ya küm shia kibong shia nem health insurance sen lakh 5 tashi agütsütsü atema Ato kilonser Narendra Modi-i tenzuka liasü.

Taoba mapang Delhi nung chief minister Arvind Kejriwal leniba nung AAP sorkari Delhi nung iba scheme ya mebenoki liasü.

Mezüngbuba cabinet senden nung Ayushman Bharat agizük aser Delhi Legislative Assembly nung Comptroller and

Auditor General (CAG) indang report 14 mebenoki aliba agizük. Item report ji Delhi assembly mezüngbuba senden nung benoktsü.

Delhi nung Ayushman Bharat agizükba ajanga healthcare mapatong nung temelenshi tulu adoktsü. AAP sorkar kübok Delhi nung nüburtem atema mohalla clinics aser hospital services angati densema facilities tanga dang liasü.

BJP sorkar tasenbai, Mohalla clinic tenüng nung AAP-i nüburtem ashiokttsüogo, anungji BJP sorkari Mohalla clinic anema bushisüngdangtsü aser AAP sorkar yimsüsüba mapang aibelenba ajak bushisüngdangtsü, ta metetdaksüogo.



February 22, 2025 nü Johannesburg, South Africa nung Union External Affairs Minister S Jaishankar-i Australia Foreign Minister, Penny Wong ajurudang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, FEBRUARY (TSÜKLAI) 23, 2025

Tsüngrem akhümtsübudi

Tsüngrem yimli nung ochi o kaji Tsüngremi Pai yangluba nisung nem Pa akhümtsübudaktsüner, anungji Pa akhümtsüburtem dangang Tsüngremia akhümtsübur. Atangji, asen Tsüngremji taochi Tsüngrem lir. Ajisüaka, Pa taochi angutsüba asenok mapa, jakla yimya aser mulungsentsü dak dang keta lir. Asenoki Tsüngrem tsüngdang kechi yimya benshir yamaji dang Pai asenok dang benshitsü. Küm 40 tashi Israel madak obendanger inyaksang Eli putiri Tsüngremi pa aser par kibong koma temeshi lidaktsüner, ibaji meteta liasü. Ajisüaka, Eli putir atema terata mapang tuluka aru, kechiyong par jabasotemi Tsüngrem akhüm metsübu, anungji parnok takümtemji Tsüngrem tsüngdang tesempatsüka liasü. Aji oda, Eli putir atema terata tulutibaji Pai Tsüngrem akhümtsübutü asü mesüra pa chirtemjiang akhümtsübutü ta asüba tasüngdangba ka pa mulungjangi aru. Tia majung, Eli putiri Tsüngrem tsütsü masü pa jabaso ana tsütsüang tejak ashi. Pai Tsüngrem dang nungibo par jabaso temeimba meim aser akhüm tetsübuta tsübu. Eli-i par jabasotem dang Tsüngrem akümtsübutü ajungshitsü melen parnok nem Tsüngrem mezüngmeshidaktsü. Yob-ibo anepdang shia yakta saaka par chirnurtem asoshi Tsüngrem nem tarongba tenla agüja sarasademtsü. Yob-i par jala jabasotemi tai menaba mangu aser mangashi saka parnoki Tsüngrem anema tai menarka alinunga ta bilema, pai anepdang shia sarasademtsü. (Yob 1: 5). Aji oda, Eli putiria inyaktsü südi ta Tsüngremibo imlar südi. Eli putiri par jabasotemi temenen mapa inyakba aser tenladak Tsüngrem mezüngmeshiba mapatem inyakba meteta dang liasü. (1 Samuel 2:22) Saka, pai parnok menokdang aser pai parnok atema sarasadem mesütsü. (1 Samuel 3:13) . Ashiko, Eli putiri par jabaso atema Tsüngrem dang mepishi asübo aser pai par jabasotemi maksütsü mapa tamajung inyakbaji nokdang asübo, Tsüngremia aochila. Ajisüaka, Eli putiri tanemi dang par jabasotem dang mapa tamajung mienyaksü o kar shirbo odang toktsü. Eli atema par jabaso anati Tsüngremi maginütsüsa inyakba mapatemji nokdangtsü koka liasü, saka pai menokdang. Tanü asenok tsüraburtem aika Eli putir amaji lir. Asenoki ngua asenok jala jabasotemi Tsüngrem mezüngmeshir saka asenoki menokdang. Atangji, Eli putiri pa jabaso ana dang ashi ama, yimya ka agibo temenen mapa meinyaktsü shia alitsüa akok, saka temenen mapa meinyaktsü menokdangra, o kijaibo temenen tongpangji makoker. Iba jagi tsüraburtem aikati pei chirnurtem mazüokteter. Joko lia-lia Eli-ia dena Tsüngrem aküm tsübutü melen, ashiko, pai par jabaso ana jagiang pa merenshitsü tsübuta bilemer asütsü akok. Aji oda, Eli aser par jabasotemi Tsüngrem aküm metsübuti aküm nungji, Tsüngremia parnok aküm metsübu. (1 Samuel 2:30) Par kibong menenyong Filistia nung ket nung Israel nung meyi semer dak tali tepsetdaktsü aser tezüngzüktepba süngdena dena bener odaktsü. Ibaji Eli putir aser par jabasotemi Tsüngrem metsübuta taa liasü. Asenok atema tekümdangtsüji ibaji lir. Asenokbo putir saka asen chirtemibo Tsüngrem mezüngmeshir, asenokbo temeshi saka asenok kibongbo memerük, asenok kidangbo temeshi saka asenok mapa inyakdakbo ochimashi mapa agi sünga lir. Asenoki tenla kidangbo Tsüngrem akhümtsübur saka kima tongerbo Pa mezüngmeshitsü tenzüker. Tsüngremi ibaji maginer. Asenok kong kechi inyaka lida, mapa ajak nung Tsüngremi asenok nem Pa akhümtsübudaktsüner. Tsüngrem akhümtsübuta taküm aser kibongang Tsüngremia akhümtsübutü aser Tsüngrem mezüngmeshiba taküm aser kibongbo Tsüngremia mezüngmeshitsü. Kibong kar nung danga tanurtemi Tsüngrem aküm metsübuti lira, tsüraburtemi ibaji nokdangtsü Eli putir kibong ajanga asenok dang Tsüngremi ajungshir. Aji oda, asenoki Tsüngrem akhümtsübuta, Paia asenok akhümtsübutü.

OLEMSABANG

AROGOTEM NUNG TSÜNGREM O TESAYUBA TSÜTSÜ
(CHRISTIAN EDUCATION) BILEMDANGSHITSÜ ONUK KAR

~ I.Asongla Pongen, Alempang Ward, Mokochung.

(Yashi adok nungi...

6. Tanü aliba lima, lemanng ajak nung kanga kera renloka aodang aiben tamanger ka tamang anokshitsüsa tatidang balala arur, anungji Arogotem nung sendong balala agibaji secular inyakyim ama, skill development training agütsüba ka ama masü saka kechi inyakba agi khristan taküm ka pa/la jakla aser liba liro melenshidakja tim lemanng nung aotsü/alitsü tesayuba agütsüba asütsüla. Taküm ka rangpen terenlok atema Arogotemi kanga meranga inyaker saka Tsüngremi asenok nem pa Chir Yisu Khrista ajanga kechi inyaktsü sangoktsü ibaji takok ngua inyaktsüji Arogo ka khuret. Yisui pa netsüng tem dang Pa Osang tajung meimchir ajak dang ashitsü aser sayutsüngitsü nungloktsü, (Mathew 28: "Aser ni nenok dang kechisa mela, item ajak benshitsü parnok dang sayuang,, Mark 16;15 "Nenoki alima ajakleni oang, aser meimchir ajak dang osang tajung sayutsüngiang"). Ibaji Khristar Arogo shia inyaktsüba, Christian Education.
7. Tanü Arogotem kar nungbo Tsüngrem O tesayuba nung masü saka Government, NGOs, Civil Socities aser Educational Institutiontemi inyaktsüba mapa tem nungang aiben nepu, sen/rongsen, mapang aser shisatsü aika endoker, saka Arogo nem nungloktsüba nung kangabo tera janga, nendaka inyaktepa ajema lir. Iba tebushitepa nung aikati hau ta ashitsü sudi. Yamaji physical development aser infrastructure nungbo Arogo aika nung jangratema aser junga inyaktetogo aser ano maneni inyaktepdagi. Yamaji Tsüngrem O bushiba aser angazükdaktsüba nunga inyaktettsü asoshi asentenshi ka nungdak aser ibaji takok angutsü asoshi Christian Education nung temulung agütsütsü nungdaka lir ta ajiteter.
8. Tsüngrem Oji tamanger ajak asoshi, anungji Tsüngrem O angatsü, azüngtsü, bushitsü, angazükdaktsütsü, ano angazükshitsü aser tesayuba ama liyonga aotsüji nisung ajak asoshi mapang ajak nung nungdaker- tila tanür (Children), aier asangurtem (Youth), taintem (Adults), tantsür tambur (Old age/House bound), matamapensartem (Person with Disability) etc, item telok balala ajak awajema Lai O tesayuba agütsütsü mapaji Arogo nung Christian Education teinyaktsü. Lokti balala ajak ya tongtettsü asoshi kipoksem mapa (House visitation with the Word of God) ya kangasa tongtipang, iba mapa nung tamakok ngura Arogo ka maintsü. Temalen shisemba ama, tanü Arogotem nung Christian Education nung tamakok aliba ajanga, Tsüngrem dak chichia amanger aika mali kümogo aser kümdagi, koda ser Tsüngrem dak chichia amanger aika mali ta ashir ta asüngdangtsü akok, saka telangzübaji nisung ajaki ngua, metetta lir kechiyong tamanger tem mapa, libaliro, chidiyongdi, tai dang tai ta meshitetba, inyakyim nung supokrem amshiba, item ajak jagi sayur. Khristan taküm ka ta asüba ajakji Arogo ka küpok züngsem kaka lir, yangji inyakyim latetta yur tenuk telen ajak tenzüker shima yur tanülar wadang takok ngua inyaktsü merangteper. Yamaji, Khristar Arogo ka küpok teinyaktsü tongtipang aika liaka item ajak rongnung tongtipangtipaji nuntsüng tem anepalua anitena Tsüngrem O, Laishiba tesayuba shidak anganua agütsübaaji mezüngbuba shilem. Anungji, amangbapur ajaki iba tsütsü ken aroka bilemdangshitsü asoshi lemsateper. Tsüngremi iba Ocet tatsü azünger ajak nem tangatetba tasen den temoatsü ngudakjangma, Amen.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Myanmar nung Khristan putir Donald Martin kotari agi tsüngset



Donald Martin Ye Naing Win

February 22, 2025: Myanmar nung Archdiocese of Mandalay nung nisung kari putir ka kotari agi tsüngsetogo, ta osang ka ajanga metetdaksü.

February 14, 2025 aonung 7:00 ako meta arrshi küm 44 putir, Donald Martin Ye Naing Win pa kija 'Ludmal Thawma' Arogo Tenla kidang aliba mapang nung prangpong amer telok ka aruba sülen pa dang apudakang ta tuyu; iba sülen parnoki kotari agi pa tsüngset.

Putir tsüngseter ajakji puogo ta osang angazüker.

February 17, 2025 nü Donald Martin Ye Naing Win asüpila sentong nung jembidang Mandalay nung Archbishop Marco Tin Win-i, "Rara ajanga tasüba aser teraksatsüba dang bener arutsür, teti tamakok dang angur," ta ashi.

Paisa prangpong amer telok balala aser ketdangsertem dang raraba

hadir toktsür ken o jembiba ajanga yimjung bener arutsü ayongzük.

Asüpila sentongji Pyin Oo Lwin yimdak Assumption of Virgin Mary Tenla kidang agi. Christian Solidarity Worldwide (CSW)-i, Myanmar nung sepaitemi yimsüsüba tenzükba mapang nungi yimsü nung ajemdaker nütsüng ajema alirtem, talisa Khristantem amaker, ta metetdaksü.

Tesüiba küm ishika Myanmar nung Tenla kitem aser Arogo lenirtem amakba den külemi Khristantem aika puogo.

February 6 nüa sepaitemi anünglen nungi amakdang Chin state kübok Mindat nung aliba Sacred Heart of Jesus Catholic Tenla ki poksaja liasü.

Catholic Bishops' Conference of Myanmar tenüng nung Cardinal Charles Maung Bo-i, "Putir Donald Martin Ye Naing Win anema

inyakba ya melamelabo mamatoktetsü. Anungji onoki ketdangsertem dang tarutsü nungbo item ama tatalokba malitsü atema aibelenertem nem temerenshi agüjang ta akhanger," ta metetdaksü.

Christian Solidarity Worldwide (CSW) tentetsang Mervyn Thomas-ia sangdong ka ajanga, "Putir Donald Martin Ye Naing Win tepsetba ya maneni Myanmar nung nütsüng ajema alirtem reshikangshiba tatishitsü ka lir. Yimsü nung ajemdaker shinga anema meinyaktsüla, ajisüaka putirtem, Tenla kitem aser Khristantem maneni amaker aser amokmerener," ta metetdaksü.

CSW-isa iba tatalokba ya jungjunga bushisüngdangtsü atema takhangba agütsüba den külemi alima linüktem danga Myanmar nung yimsü temeden kümzüka ayutsü atema inyaktsüla, ta mepishia metetdaksü.

Yirusalem nung Armenian Arogo meyong kiojen merakzüktsü mepishir

February 22, 2025: Yirusalem nung Armenian Patriarchate-i Israel nung ketdangsertem dang tesüiba küm 1,700 tashi Armenian Christian Patriarchate meyong aliba kiojen merakzüktsü aser mayoktsü atema mepishia metetdaksü.

Israel nung ketdangsertemi Arogo meyong kiojenji agitsü aser 'auction' asütsü tebilemba lir.

1994 küm municipal saru dak sendakba nung Armenian Christian Patriarchate-i ken o benoka lir. Municipality of Jerusalem-i Yirusalem yimti tejenba kübok Armenian Quarter nung aliba Arogo kiojen ka shibangtsütsü tetuyuba agüja lir.

Arogoibo, legal inyakyim alema municipal ketdangser kati Arogo sentsüh lir ta sangdong, ta metetdaksü.

Yirusalem nung aliba Arogotem nung tekolakpurtem aser Arogo ketdangsertemi, "Israel

sorkari judicial medeni aser sorkar committee medeni Arogo anema sentsüh sangdonger," ta aitsüogo.

Israel nung kiojen saru dang 'Arnona Tax' ta ajar. Küm shia municipal-i kiojen saru sarur aser iba saruji January 1 nungi December 31 tashi atema lir.

Ajisüaka Armenian Christian Patriarchate-i, mejangjaba sentsüh meshiba ajanga yimsü temeden anema inyaker, aser iba ya ajanga Israel nung tanga Khristan rejutem-ia amokmeren ajurutsü, ta metetdaksü.

"Iba ya temeden ajak tajemdakdak- yimsü temeden anema lir, kechiyong kiojen rakzükba den külemi Orthodox Armenian Arogo taküm alitsü aser inyaksangshitsü atema rongsenkettzüng temeden anema inyaker. Iba ya ajanga Orthodox Armenian Patriarchate jenjang raksatsür aser Temeshi Lima (Yirusalem) nung tanga Khristan

rejutem anema-a inyaktsü akok," ta parnoki metetdaksü.

1 Korint 12:26 nung shia aliba "Züngsem ka timtemra ajak timtemer" nung ajemdaker Armenian Christian Patriarchate-i Israel Ato kilonser Benjamin Netanyahu den tanga ketdangsertem dang Arogo kiojentem shibangtsütsü alibaji nokdangang aser telemtetba tajung agitsü atema ken o jembishitsü atema inyakang, ta mepishi.

Iba dak alia Armenian Patriarchate-isa 2023 küm nungi Israel nung Khristantem aser Arogo meyong kiojentem kanga bulua amakba tebilemstsü lemsatep.

Israel nung nütsüng shilem 1.9 dang Khristantem lir. Khristantemji shilem 73.3 bo Arab Khristantem lir (Israeli Central Bureau of Statistics).

Israel nung nütsüng million 9.8 lir aser iba nungjagi nütsüng shilem 73 bo Yihuda nungertem lir.

ANOGO ABEN TSÜNGREM DEN

TEMELI TASHITAK TENET

Shibai pei bang mitdir pai pei taküm soter; saka shibai pei bang ulua lapoker, pai tesama angur.

~ **Apijemtsü 13:3**

Aser tetsü-tebu otsü nung tebang-temeli ken ka tanur asüdang tena angashiba bilemteter, o tajung aser tanang jembiribo temoatsü angur, saka o tesepra jembirbo tazükba-ang angur. Asenoki Temeshi Laishibai nungi temeli tashitak tenet reprangdi;

- (1) Tangar indang jembiba: Apijemtsü 16:28-Mashikoshi nisungi rarabangsen ayimdaker proker; aser miim o jembiri akang tembar piladaktsü.
- (2) Teyazü kuli: Anitet 20:16-Nai kiyonger anema teyazü kuli teyi.
- (3) Mashi jembiba: Apijemtsü 12:18-Noklangnok agi settoktsüba ama mashibangi jembiba otem lir; saka shisa takar temeli ajanga tanebtsü bena arur:
- (4) Atakatemba o temeli: Yakob 3:9-Iba yagi asenoki Kibuba aser Tebu tenüng asanger, aser iba yagi Tsüngrem mesüka yangluba nisung atakatemer.
- (5) Pei sasa asangba temeli: Apijemtsü 27:2-Nebangi masü tangari na sangdakjang.
- (6) Nemnemshinem temeli: Filipi 4:14-Aji saka nenoki kü timtem toushi lemsatep nung, nenoki tajungba benshi.
- (7) Tangar majung dang asükba: Efesa 4:29-Nenok lebang nungi o tamajungka danga tatokdaktsü. Saka teningdaktsü amato kechi yangluloktsü, asoshi tajung lir, tangashirtem nem taochi agütsütsü aji jembaliang.

Asen tebang temeli-i kechi jembir asenoki angaa meteta jembitsü kanga nüngdaker. Taküm nung temeli-i shilem tulu agir, süra aseni Tsüngremi mulungba ama amshidi ta ayongzüker.

Rajasthan nung anti-conversion ozüing tasenba benokogo

February 22, 2025: Tan hopta Rajasthan state nung anti-conversion ozüing tasenba benokogo; iba ozüing kübok tamangba yimsü melentsüpurtemi ita ana jelia sorkar ketdangsertem nem osang metetdaksütsüla, ta International Christian Concern (ICC)-i metetdaksü.

Iba dak alia yimsü melenba sentong ketdangsüa agitsüpur danga ita ka jelia sorkar ketdangsertem nem osang metetdakjang ta tuyuogo.

India kübok state aika nung anti conversion ozüing tim masüba nung amshia Khristantem nem tiyazü nung tai tonglokja apur.

Rajasthan Prohibition of Unlawful Conversion of Religion Bill, 2025 ozüing kübok tamangba yimsü melentsü atema inyakyimji kanga tasak. Iba ozüing tasenba kübok tamangba yimsü meyipba inyakyim nung aibelenertem küm 3 tashi jail nung puoktsü akok mesüra senchi ishiba agia sen 10,000 achitsü.

Tamangba yimsü melentsüpurtemi 'prescribed declaration form' ka anogo 60 jelia District Magistrate (DM) mesüra tim ketdangser ka ket nung agütsütsüla. Yimsü melentsüpur kati aibelenra küm pongu tashi tepuokdak ayutsü aser senchi tajemba agia sen 25,000 achitsü.

Additional DM aser iba dang nungi temaba ketdangser kati police ajanga nisung ka yimsü melentsü tebilemba aliba chichiba nükjidongji asadangtsü.

Yimsü meyipba sülen anogo 60 tsüngda nisungba jagi DM nem sangdong ka agütsütsü aser iba sangdongji DM office kima notice board nung madaka ayutsü.

Tatemsä yimsü melensang jagi anogo 21 tsüngda DM ajurua parnok maitsü jangjadaktsütsü.

Rajasthan nung ketdangsertemi ashiba agi, state nung ozüing alema yimsü meyipdaksüba kanga bulua akümer, talisa mesüzüka, tashiyim amshia, ashikülak ajanga, senotsü mesüra tagitarutsü sempet agüja, mapa mesüra shisaliok angati agütsütsü ta nangzüka yimsü meyipdaksür, ta metetdaksü.

Item ama ozüing alema yimsü meyipdaksüba nokdangtsü nükjidong nung anti conversion ozüing benoker, ta parnoki metetdaksü.

Rajasthan dak alia ano tanga state 11 nunga anti-conversion ozüingtem benoka lir. Iba ozüing benoka aliba state temji Uttar Pradesh, Odisha, Arunachal Pradesh, Chhattisgarh, Gujarat, Haryana, Karnataka, Jharkhand, Uttarakhand, Madhya Pradesh aser Himachal Pradesh state tem lir.

AO OSHI ANGAZÜKDAK:**TANÜ ANGAZÜKTSÜBA OJANG****Tejulang**

(adj)tenari masü, ajurepa (tapering)

* Asenok temeyong ya ajak tejulang lir.

Tejungnü

(adj) tajung inyaknuba, tagütsünü (generous)

* Khristan taküm ka jaklaji tejungnü asütsüla.



Tir Yimyim

OLONG PAITEP # 7072

1			2			3			4	
			5		6		7			
8										
			9							
	10									
								11		12
			13				14			
15						16				

TIPIEN

1. Anenzükdak ki
3. Asür mangyimba
5. Temulung nung shisadang
8. T ____ lu
10. Takdang temalen
11. Tesa ____ a
13. Ajungbena temulungjang
15. Tejen lai nung tesayur
16. Tsüingsak-mopung

LANGTSÜNGLEN

1. Reprangdaksü
2. ____ ur
4. Kiojen yangludak
6. ____ ait
7. Nagaland nung ayong ka
9. Küm kasa purtem
10. Tetsüing tajemtdak
12. ____ adenshi
14. Tsünüsenbongtsü adokdak

OLONG PAITEP # 7070 TELANGZÜBA**TIPIEN :**

1. Kasa, 6. Rangben,
7. Mait, 9. Poktet, 11. Ati,
13. Atasa, 16. Rür, 17. Rajang,
20. Lanu, 24. Nüngjem, 25. Süra.

LANGTSÜNGLEN :

1. Khu, 2. Süjak, 3. Onük,
4. Oba, 5. Anü, 6. Ratet,
7. Mozü, 8. Ita, 10. Tar, 12. Tinu,
14. Salem, 15. Aja, 18. Anünü, 19. Taju,
21. Ano, 22. Onü, 23. Kua.

NAI-A YA METETTER MA

Maharashtra nungi arishi küm 14 tain kaketshir Aaryan Shukla-i anogo ka nung Guinness World Records 6 tashi yanglutetogo. Dubai nung mental math competition ka agidang mental math competition agidang Shukla-i item otsü yangluteta liasü.

Fastest time to mentally add 100 4-digit numbers (30.9 seconds)

Fastest time to mentally add 200 4-digit numbers (1 minute 9.68 seconds),

Fastest time to mentally add 50 5-digit numbers (18.71 seconds),

Fastest time to mentally divide a 20-digit number by a 10-digit number -set of 10 (5 minutes 42 seconds),

Fastest time to mentally multiply 10 sets of 2 5-digit numbers (51.69 seconds)

Fastest time to mentally multiply 10 sets of 2 8-digit numbers (2 minutes 35.41 seconds).

Arunachal nung NCP züngsem 1,000 tema INC nung aden

Itanagar, February 22, 2025

(Agencies): Arunachal Pradesh nung Panchayat elections agitsü aliba jakdang Nationalist Congress Party (NCP) züngsem 1000 tema Indian National Congress (INC) nung denogo.

Iba ya East Siang District nung lir aser Rayang village nung aliba Uma Ganga Ecological Resort nung sentong ka agidang NCP züngsemtemi Congress nung aden.

Iba sentong nung Arunachal Pradesh Congress Committee (APCC) working president Bosiram Siram, District Congress Committee president Alen Perme aser tanga lennirtem aden.

37th Pasighat West Assembly Constituency nung taoba NCP election agent Tamat Saroh-i anir züngsemtemi Congress nung züngsem aküm.

Parnok rongnung taoba NCP party candidate Tapyam Pada aser block o village-level office bearers densema lir.

"NCP lennirtem aser züngsemtemi BJP den tokteptsü atema national party tongtipang ka nung adentsü lemtet. Bosiram Siram lenisüba kübok onok INC nung adenba party tali tashi aittsü imlar" ta Saroh-i ashi.

Bosiram Siram-ia NCP züngsemtem pelashishia agizük. "Iba ya 37th Pasighat West aser Arunachal Pradesh ajungalen atema INC jenjang renlokba lir" ta pai ashi.

AICC president Mallikarjun Kharge aser PM candidate Rahul Gandhi na lenisüba kübok INC-i kobi melii sorkar akümtsü ta paisa ashi.

INC-i asalentong tajung yanglua ayuba ajanga tanü NCP züngsemtem parnok den

denogo. Taoba assembly election mapang 37th Pasighat West nung Congress-i candidate meshim.

Ajisüaka, Bosiram Siram-i INC atema MP candidate ka ama toktepdang BJP candidate Tapir Gao den votes teimba nguteta liasü.

Pasighat West nung iba ajanga taküm December ita Panchayat elections agitsü aliba nung INC tajangzük angutsü.

Iba inyakyim ajanga Congress ajangzüksü aser talisa tang Arunachal Pradesh Freedom of Religion Act-1978 (APFRA-1978) atema ashishitepba mapang parnok jenjang tajungba akümtsü imlar.

Iba Act ajanga tamangba yimsü nung ajemdaker nisungtem lemsar aser iba ya freedom of religion anema lir, ta Siram-i ashi.

Guwahati nung USTM Chancellor Mahbubul Hoque apu

Guwahati, February 22, 2025

(Agencies): Assam Police aser Special Task Force (STF) külem telok kati Guwahati nung University of Science and Technology Meghalaya (USTM) Chancellor Mahbubul Hoque puogo.

Mahbubul Hoque apuba atema osang tejangja maliasü saka angashiba agi CBSE Class 12 Physics examination mapang pai sen meshia agiba atema apu.

Assam kübok Sribhumi district nung kaketshir 274-i Kendriya Vidyalaya nung Physics exam agütsü. Kaketshirtem rongnung iba

school nungi 45 aser ERD Group (Haque-i lapokba foundation) nungi 214 dena lir.

Iba tatidang nung ERD Foundation nungi kaketshirtem yaritsü atema jelia sen agütsür liasü saka parnok dang nangzükba ama teyari manguba agi exam centre nung mepetmesü adok.

ERD Foundation-i tim masüba mapa inyakba osang angashiba sülen police aser STF-i bushisüngdang ka tenzük. Iba nung ajemdaker Honibarnep Hoque pur Panbazar Police Station-i anir ao.

USTM nung degree taila agütsür aser senotsü tim mesüi

amshir ta tawa tu Assam Chief Minister Himanta Biswa Sarma-i tai tonglojka liasü.

Taoba MP aser Congress lennir Ripun Bora-i USTM founder Hoque apuba aitsüogo.

"Assam Police-i ayaterm nung USTM Chancellor Mahbubul Haque apuba aitsür. Tesüiba ita ishika Assam CM Himanta Biswa Sarma-i Haque aija arur. Pa ya North East nung ajaki meteta aliba educationist ka lir" ta Bora-i metetdaksü.

"USTM tekolakba ya ashikülak ka lir aser iba reju ajanga kaketshirtem nem taila kulikakettem agütsür" ta CM Sarma-i ashi.

Moran nunger lungkak aitha ajanga arrtsülen tensa raksaogo

Itanagar, February 22, 2025

(Agencies): Arunachal Pradesh nung aliba Moran nungeri Permanent Resident Certificates (PRC) meshia takhangba agütsüba ajanga Assam-Arunachal arrtsülen tensa mejungi kümogo.

Moran Students' Union (MSU)-i anir lungkak aidang lenmangtem mokdang, police-i lungkak aiterem apu aser tensa mejungi kümogo.

February 22 nü Moran Students' Union-i Dirak Gate nung National Highway 15 mokdang lungkak ait.

Parnoki Moran nunger nem PRC meshia lenmang

mokdang lungkak ait aser iba ajanga sepaitem tesem tonga ao.

Police-i Moran Students' Union tanishir tongtipang pungu- Surjit Maran, Manoj Maran, Sarat Neog, Bhugen Baruah, aser Kushal Maran nunger apu.

Parnok apuba anema Arunachal kübok Namsai district nung nisung aika Mahadevpur police station kima adenshir talila lungkak ait.

Moran nunger aser talisa Arunachal Pradesh kübok Lekang Circle nung alirtemi mapang talangka nungi PRC meshia arur.

1987 nung Arunachal Pradesh state makümdang nungi Moran nunger liyonga arur ta AMSU (All Moran Students' Union)-i ashir.

Ajisüaka sorkari pamok nem PRC magütsür aser iba ajanga tanga recognized communities-i anguba rights & benefits mangur.

February 20 nü AMSU aser Lekang Circle nung alirtemi 39 buba Arunachal Pradesh Statehood Day benjung nung maden.

Iba ajanga Mahadevpur Town, Mahadevpur Chariaili, aser Dirak Gate mokdanga liasü.

Hamasi Israel nungertepuokertem chiok



Gaza City, Tsüklai/February 22 (Agencies): Israel nung tepuokdak balala nung yua aliba Palestine nung noklang aika melena Hamas-i ano Gaza nungi Israel nung pongu chiokogo. Israel aser Hamas na ceasefire atema tenangzüktepba yangluba mezüngbuba shilem nung Honibarnü tatembangsa tepuokertem melentepogo. Honibarnü mezüngbuba Tal Shoham aser Avera Mengistu na southern Gaza kübok Rafah nung Red Cross nem bendanga agüja liasü. Tena ya Hamas pur sepaitemi sabang kati anir aruba sülen bendanga agüja liasü. Iba sülen ano central Gaza kübok Nuseirat tesem nung sentong balaka ayongzüka agia Eliya Cohen, Omer Wenkert aser Omer Shem Tov nung Red Cross ketdangsürtem nem bendanga agütsüogo. Palestinian sources-i Al Jazeera dang ashiba agi, tepuoker trokbuba-bo sentong kecha ayongzüka magi-i Israel nung ketdangsürtem nem bendanga agütsütsü. Arishi küm 37 tain Bedouin Israeli, shiba 2015 küm April ita Gaza-i aiba mapang pua liasü, pa Gaza City kübok tesem ka nung ketdangsürtem nem bendanga agütsütsü imlar. Ceasefire atema nangzüktepba kübok mezüngbuba shilem nung tepuoker 33 chioktsü aliba nung parnok trok ta tatembangbuba liasü. Al Jazeera osangbener Hani Mahmoud-i Nuseirat nungi ashiba agi, tepuoker asem chiokba repringtsü atema nüburtem aika sentepa liasü. "Inyakyim kecha tetsükdaktsü makai agitsü atema Qassam Brigades nungia sepaitem arua aliba nguogo," ta pai ashi. "Toba mapang den medemdangra Nuseirat nung tepuokertem bendanga agütsüba sentong kanga bentet benteta agiogo," ta paisa shisem. Kasa mapang nung Israel-ia tepuoker trok melena ya Palestine nung 602 chioktsü. Tepuokertem rongnung parnok 445 bo Gaza nung raraba mapang Israel nung sepaitemi apuba lir aser kar taküm tepeyong mesüra mapang talangka atema tepuokdak ayutsü obendang agütsür alirtem lir. Brehostibarnü Shiri Bibas indang tasü mang tai yokba sülen mepetmesü adoka liasü. Bibas ya lar jabaso ana aser kinungbo den October 7 nü Hamas-i southern Israel amaba mapang pur oa liasü. Ajisüakja Hamas puri Hokolbarnü la indang tasü mang agütsüogo aser lar kinungertemi tasü mang ya la indang ta shiogo.

M23 teloki DRC anütoklen tesem aika atsünga odar

Kinshasa, Tsüklai/February 22 (Agencies): DR Congo anütoklen sorkar anema nokdakba teloktemi tesem aika atsünga aoba mapang ka nung UN Security Council-i tang mezüngbuba Rwanda dang M23 telok nem teyari ojang dang agütsütsü aser azütokshi anentsü ayongzükogo. UN experts temi ashiba agi, iba telok nem Rwandan nung sepai 4000 shi-i teyari agütsüdar aser parnoki Democratic Republic of Congo anütoklen tesem aika atsüngogo. Iba tesem ya alirongsen aika aliba tesem ka lir. North Kivu yimtiba aser linük anütoklen yimti tongtibangba Goma atsüngba sülen iba telok yagi Deobarnü South Kivu provincial yimtiba Bukavu atsüng aser iba ajanga nüburtem aika pei talidak ki toktsür jenshia aotsüsa aküm. Hokolbarnü agizükba UN Security Council bangzüng ajanga Rwanda Defense Forces-i teyari agüja North-Kivu aser South Kivu nung M23 teloki tesem balala atsünga aoba aitsüogo. UN-i, Rwanda Defense Forces dang M23 nem ojang dang teyagi agütsütsü aser preconditions kecha meyui DRC nungi tangsa tang atsüngintsü ayongzükogo. Security Council-i taoba mapanga telok ajak dang rara anentsü atema ceasefire benoktsü ayongzükogo, saka Hokolbarnü Africa züngsemtem densema linük ajaki Kigali dak tai tongloktsüogo. Tawa asendenshir rara tenzükba ajanga Congo nung 50,000 dak tema Burundi, Uganda aser tanga linüktemi jenshiogo, ta UN-i ashi. European Union-i


OFFICE OF THE
AKHOYA SENSOTSÜR TELONGJEM KOHIMA
KOHIMA, NAGALAND
TENÜNGSANG AGÜTSÜR
Akhoya Sensotsür Telongjem Kohima ajanga **Wt. Arenla Longkumer** (NSS) d/o Lt. P. T. Meren aser Wt. Senlitsüla Jamir, Nagaland sorkar mapa Department of Rural Development, Government of Nagaland nung Joint Secretary menden tongtetba asoshi konang nüngsang aser tetüshi agutsür. Maneni la sorkar aser nübur tenzükba wadang nung Tsüngremer temoatsü aser arishi moajangma ta sarasademtsür.
Sd/-
Temsusongla Imsong
President
Sd/-
Akumnaro
General Secretary

ALI TAYOKTSÜ LIR
1. OLD SHOWUBA AREA KHEHOKHU VILLAGE @170 Per sqft.
2. NEAR FOOTHILL ROAD 4 MINUTES DRIVE FROM HIGHWAY.
@ 42 Per Sqft. (Any size available) Contact : 9863826159

Iran-i Tel Aviv rongtoktsütsü amokmeren

Theran, Tsüklai/February 22 (Agencies): Gaza strip atema ceasefire benoker aliba kodang chireptsüar mejangjai aliba mapang ka nung Iran aser Israel nung ketdangsürtem kati ka amokmerentepba ajanga Middle East nung tensa mejungji kümdaktsü. Iran indang Islamic Revolutionary Guard Corps (IRGC), indang general Ebrahim Jabbari-i, Iran-i mapang tapet nung Israel raksatsütsüsa "Operation True Promise 3" benoktsü, ta ashi. General shiba IRGC chief commander Hossein Salami indang adviser lir, pai tang "The Great Exercise of Prophet Mohammad's Power" ta nüngja agütsür ayongzüka agia aliba drill mapang paramilitary forces den jembidang iba olen ya lemsatapa liasü, ta Iran International-i metetdaktsü. Pai ashiba agi, iba operation yagi Tel Aviv aser Haifa na meshimeshia rongtoktsütettsü. Iran-i tang agi tasembenbuba yamai Israel amokmerenogo. Deputy IRGC commander Brigadier General Ali Fadavi aser IRGC indang Aerospace Force commander General Amir Ali Hajizadeh natia 'Operation True Promise 3' ajanga Israel raksatsütsü amokmerenogo. Kasa mapang nung Israel indang Foreign Minister Gideon Sa'ar-i, X ajanga iba amokmeren ya süoki ia agir aser pei nübur aser litsü kümzüka ayutsü atema Israel renema lir, ta ashi. "Yihuda nungertemi puti otsü ajanga langka ka danga angazüker lira aji ya asütsü: ner tsükchiri pa nükjidongji na samatsütsü asoshi lir ta shira pa dak amangang," ta pai ashi. Jabbari-i amokmerenba dak sendkaba nung "Onok renema lir," ta pai ashi. Donald Trump United States tir akümba sülen Iran-i kanga minprongda aser parnoki Israel amokmerenba tali küma odar. 2024 küm April aser October ita Israel anaben tashi amakba sülen, Operation True Promise 3 ya Iran-i Israel amaktsü atema sentong yanglur aliba indang nüngja lir. Ajisüaka Israeli air defences den US aser parnok den sendaktepa aliba linüktemi teyari agüja Iran-i yokba misile tem timba khadang aser teraksatsüba tulu adoktsü aliba nungi jenboa liasü. Taoba küm Iran parnok meketa aliba tesemtem nung kanga akoksaogo, kechiyong Israel inyakyim ajanga Lebanon nung Hezbollah aser Gaza nung Hamas pur inyakyim tashi meiti aküm aser iba den Syria nunga Bashar al-Assad atsüngtoka liasü. Iba den bendenloksema ano Hamas lenir Ismail Haniyeh-a Tehra nung pa indang guesthouse nung pokseta südaktsü. Taoba ita ishika missile timba yanglu tenzükba sülen tang Iran-i Israel amokmerener. Taoba hopta China-i Iran nem rocket fuel precursor chemicals ton 1000 agütsüogo aser IRGC-ia taoba mapang underground "missile city" tasen ka sayaogo, ta Jerusalem Post sangdong ka ajanga metetdaktsü. Iba den bendenloksema Hajizadeh-i Mongolbarnü Iran-i Israel dak alima nung ballistic missile operation tulutiba benoka inaktsü koka aliba tenüngsanga jembi. Kasa mapang nung Jabbari-i Hezbollah lenir Hassan Nasrallah tenüngsanga jembi, shiba October ita Israel-i tepseta liasü.

Saudi Arabia-i China kokogo



China, Guangdong Province kübok Shenzhen nung AFC U20 Asian Cup football tournament asayaba mapang China nung asayar PENG Xiao (tachichi) aser Saudi Arabia nung asayar Abdulmalik Alharbi na ball raktepba mapang tangokba noksa nung angur.

Shenzhen, Tsüklai/February 22 (Agencies): 2025 AFC U20 Asian Cup quarterfinal nung Honibarnü Saudi Arabia nung asayar substitute Amar Alyuhabi-i goal ka idaktsüba sülen parnoki China goal 1-0 agi kokogo.

Iba asaya makokba sülen China 2025 küm Chile nung asayatsü aliba FIFA U20 World Cup atema qualify mesütet.

Asaya atemtsü lia minute 95buba nung Talal Haji-i agütsüba ball ka Alyuhabi-i

goalkeeper ajanga goal post tachichilen kinük nung ball metsüokja liasü.

Iba asaya nung China indang ball position 59% liasü aser parnoki asaya

U20 AFC ASIAN CUP

mapang talangba ka amokbanger asaya, ajisüaka asaya tanabuba shilem nung penalty ka midaktsütetba densema parnoki goal idaktsütsü asoshi maongka

anguba aika magiteti liasü.

Head coach Dejan Djurdjevic-i China team nung asayar tajungtem ajak yok, saka Saudi Arabia-i mimlai lia telemtetba ka agia Rakan Alghamdi, Haji, aser Ziyad Alghamdi nung densema tongtibang asayartem aika tetenzük nungi masayadaktsü.

Asaya tenzük minute 30buba nung Wang Yudong-i goal ka idaktsütsü asoshi maongka angu, saka pai metsüba ball post nung ondak.

Iba sülen minute 59buba nung Wang alangdaktsüba sülen China nem penalty ka agütsü, saka Liu Chengyu-i metsüba penalty ya Saudi goalkeeper-i nokdanga liasü.

Asaya atemtsü minute 30 anunga lia Saudi Arabia-i Alyuhabi aser Haji na densema substitute aika anioka asaya.

U20 Asian Cup regulations nung temaba jenjang nung tembangba team pezü 2025 FIFA U20 World Cup atema qualify asütsü ta shia lir, koba September aser October ita Chile nung asayatsü lir.

National football team director asütsü Subrata shim



Tsüklai/February 22, 2025 (Agencies): Taoba mapang India team goalkeeper Subrata Paul, All India Football Federation (AIFF) technical committee-i national team director asütsü shimogo. Parnokisa tebur U20 team coach asütsü Bibiano Fernandes shimogo.

Taoba mapang India team captain IM Vijayan lenisüba nung agiba technical committee senden nung iba telemtetba agi, kong Shabbir Ali, Victor Amalraj, Climax Lawrence, Harjinder Singh aser Santosh Singh nungeria shilem agia liasü.

AIFF Secretary General Anilkumar Prabhakaran aser treasurer Kipa Ajay na den technical director Syed Sabir Pasha nungera senden nung dena liasü.

"Technical Committee-i, National Team Director asütsü taoba mapang India international Subrata Paul shimba jangjatsür," ta AIFF-i metetdaktsü.

"Committee-isa, U20 National Men's team head coach mapa abentsü atema Bibiano Fernandes shimtsü benokogo," ta kasa sangdong ajanga metetdaktsü.

Technical Committee-i, grassroots nung football terenlok asoshi mapang talangka ka agia sensaksemogo, aser state o national jenjang nung tetsür aser tebur arishi küm 9-10 aser 11-12 tsüingda alirtem atema kümshia inter-school asayamung ayongzüka asayatsü benok.

Tebur aser tetsür national team asayaba yimya ajungkettsü atema technical committee-isa, züngsem pezü agi kümtetba study group ka

tentettsü benokogo, kong Sajid Dar, Jeddy Almeida, Shakti Chauhan aser Gumpe Rime nung züngsem asütsü.

Vijayan-i ashiba agi, pai aniba committee aser technical department-i development programme nung temelenshi kar asoshi benokogo aser iba ajanga linük nung jenjang aketba asayartem anitettsü asoshi teyari agütsütsü.

"Tang grassroots aser youth level nung asayartem aika lir. Ajisüaka national team-i asayadaktsünüba ama masayateti arudar," ta Vijayan-i ashi.

"Tang asenoki jenjang aketba asayar nüngdaker. Terenlok asoshi lenmang tasen aser development programme tasenba yanglushiba ajanga jenjang aketba asayar adokdaktsütsü," ta paisa shisem

Kasa mapang nung Anilkumar-i ashiba agi, technical committee-i youth level nung tetsür aser tebur asayartem terenlok asoshi lenmang ka sayuogo.

"Arishi küm teku nungi tenzüka committee-i state level nung preliminary stage aser national level nung final round asayatsü atema inter-school grassroots level asayamung ayongzüksü benokogo," ta pai ashi.

"Iba tetoktepba nung asayartem ya youth academy tem atema under 13 asoshi scout asütsü, shirok tang national youth league nung asayadar. Iba sülen under 15 aser under 17 category atema inyaktsü. Iba sülen committee recommendation dak ajemkdaker onoki sentong yanglushitsü," ta pai ashi.

Mirra Andreeva WTA 1000 finalist tanutsüla kümogo

Tsüklai/February 22, 2025 (Agencies): Arishi küm 17 tain Mirra Andreeva-i Dubai Championships nung Hokolbarnü Elena Rybakina koka WTA 1000 tournament ka final tonga asayaba asayartem rongnung tanutsütila kümogo.

Russia tsürla yagi semifinal nung deciding set nung 1-3 agi mekoki aliba nungi meyipa tur bat sixth-seeded asayar Rybakina 6-4, 4-6, 6-3 agi koka la indang career nung mezüngbuba WTA 1000 final ka tongtetogo.

Andreeva ya iba amala jenjang ka nung asayaba asayamung ka nung Grand Slam champions aika akokba asayar tanutsütila kümogo. Lai iba asayamung nung Iga Swiatek, Marketa Vondrousova, aser tang Rybakina koka final tongtetogo.

Final nung la Clara Tauson den asayatsü, shibai semifinal nung Karolina Muchova 6-4, 6-7 (4/7), 6-3 agi koka liasü.

"Iba ya tamamangtsüka lir, kechiyong ni Dubai arua takok ngua asayatsü ta kecha bilema maliasü. Ni odang oa asayatsü ta bilema liasü," ta

Andreeva-i ashi.

"Kodang na koma asayatsü aji bilema melilir idangji nai asayanüba ama tajungtiba asayateter. Tatem nung iba asayamungji na asoshi tajungtiba ka asür," ta laisa ashi.

Kasa mapang nung arishi küm 22 tain Tauson-i hopta tepeyong kanga junga asayaogo aser lai world number one asayar Aryna Sabalenka dena tsükdakja liasü. La tang la indang career nung asayamung tulutiba ka final tongtetogo. Lai tang tashi nung final pongububa tongteta lir.

Tauson-i taküm asaya 15 koka lir, koba Swiatek aser Australian Open champion Madison Keys na dang nungi ka agi timba lir. Tenapronglai asaya 14 koka lir.

Iba asayamung final tonga asayaba sülen Andreeva world number 11 akümtsü aser lai iba asayamung kokra la ya Nicole Vaidisova sülen top 10-i aiba asayartem rongnung tanutsütila akümtsü.

La küm ana tejakdang tour nung mezüng asaya tenzüka saka kanga kara la indang jenjang yangluogo.

Bhaker-i anir India team World Cup

Tsüklai/February 22, 2025 (Agencies): Nüngtugu pistol shooter aser Khel Ratna awardee Manu Bhaker-i anir India team nungi asayar 35 ISSF World Cups nung asayatsü. Iba asayamung ya South America nung asayatsü aser international shooting season tetenzük asütsü.

Season nung mezüngbuba leg Buenos Aires, Argentina nung April 1 nungi 11 tashi asayatsü koba Rifle/Pistol/Shotgun World Cup asütsü. Iba sülen Lima, Peru nung April 13 nungi 22 tashi tanabuba combined World Cup asayatsü.

Manu Bhaker, shibai Paris Olympics nung 10m women's air pistol aser 10m air pistol mixed team event nung bronze medal ana ngua liasü, la women's air pistol aser 25m pistol ta asaya ana nung asayatsü.

South American nung asayamungtem atema renemtsü asoshi National Rifle Association of India (NRAI)-i Karni Singh Range, New Delhi nung March 14 nü nungi tenzüka camp ka ayongzüka agitsü renema lir.

BILEMDANGANG

"Anema melira tebilemba ajak amajok."